



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 7

J&K election: Ganderbal nungi taoba CM Abdullah tokteptsü

Israel mitkari Gaza nung Hamas-i pua alir ka kumzükogo

VOL. XXI ISSUE NO. 315 (ADOK 315) DIMAPUR RASEMNÜ (WEDNESDAY) LUROI (AUGUST) 28, 2024 ₹ 5.00

## Nagaland Assembly nung NLPT Act benoka lemsatep; Public den jembir ang lemtet agitsü

**Kohima, August 27, 2024 (TYO):** Mongolbarnü Nagaland Legislative Assembly (NLA) nung Nagaland Liquor Total Prohibition (NLTP) Act benoka lemsatepogo.

"Sorkari Act agientsüba masü saka tera salanürba dang lir aser civil societies, public o arogotem den jungjunga jembiba sülen ang tatemang lemtet ka agitsü" ta Chief Minister Neiphiu Rio-i ashi.

Tanü monsoon session mezüing anogo nung iba onük jembidang mapang teimba endoka liasü. Advisor Moatoshi Longkumer-i 'Health Hazards of Spurious Liquor' ta ser onük benok aser ibaji Minister Temjen Imna Along aser Advisor Dr. Kekhrielhoulie Yhome nati pusema nungit.

Nagaland Liquor Total Prohibition Act (NLTP) 1989 mapa shitak meinyakteti tamakok anguba atema tebilemstü abener ta MLA 11 shi kati olemtepdang ashi.

"Iba Act ajanga lokti nung temelenshi bentsür arutsü ta teimla kanga liasü saka Assam den kilometer 510 agi arrtsü junga maliba ajanga mapa takok ngua meinyakteter" ta Excise Advisor, Moatoshi Longkumer-i ashi.

"Iba Act ajanga nübortem asoshi khuret ang adokdaksü aser iba nung ozüing alema yi shibelena ayokba aser yi tamajung ayokba



August 27, 2024 nü Nagaland Legislative Assembly (NLA) monsoon session tenzükba anogo nung Chief Minister Neiphiu Rio-i o jembiba angur.

dena lir. Anungji asenoki Act meyipa repringshi junger ta shidanger" ta Moatoshi-i ashi.

"Iba Act ya police aser excise ajanga tajungtiba nung inyakangogo saka tenokdangba ajanga yi ayoker teimba kümogo aser yi tamajung bener arua ayokba ajanga lanur temang nung timtem adokdaksür" ta Minister Temjen Imna Along-ia ashi.

"Asenoki iba Act agienra temang nung yi dak sendakba tashidak talila makümtsü. Anungji asenok o asenok na amokmeren mesütepi nisung ajaki olemtepdang adentsü mepishir" ta pai ashi.

"Linük mesüra state kecha nunga 'total prohibition' takok ngua meinyaktet saka yi ayokertem ang ajanzükter.

Nagaland nung iba Act yangluba sülen mapang melenshiogo anungji asenoki jungjunga olemteper lemtet tajung ka agitsüla" ta Imna Along-isa ashi.

"Iba olemteper ya Act yanglushitsü mesüra bangzüing ka renemtsü atema masü. Yi ajemba aser moko achiba ajanga asenok temang nung timtem agütsüba asenok ajaki meteta lir saka yi tamajung anguba atema tebilemstü abener. Asenoki nübortem ne angatetdaksütsüla aser iba atema asenok külemi inyaksüla" ta Advisor Kekhrielhoulie Yhome-ia Act meyipa repringshitsü pusema jembir.

1989 nung pa Under Secretary to the Government ama inyakang arogotem aser

Naga Mothers' Association-i masü tashi lumitsü tenzükba ajanga iba Act yanglutsüsa aküm ta Advisor K T Sukhalu-ia ashi.

"NLTP Act yangluba ajanga loktiliba nung temelenshi karbo adoktsü ta teimla liasü saka kümtem süia arudang asenoki takok aser tamakok angu metetogo. Jenjang tasak agi yi alia mejemteteremi sunflower amala jenjang dalang agi anguba drugs achir" ta Sukhalu-ia ashi.

"Asenoki NLTP ya benshia aotsü ta süra nübo aser inyaksangshi nung tebiolemstü ajurutsü. Loktiliba tajungba akümtsü asoshi asenoki ozüing inyaksü aser yanglushitsü tebilemstü khuret lir. Iba Act yanglur küm 34 tashi aruba ya

asayamenü ka masü. Tarutsü putu atema lemtet tajungtem agia asenoki lanurtem asoshi senmang tajung yutsütsüla" ta Advisor Sukhalu-isa shisem.

"Iba olemteper tenzükogo aser maneni jembia aotsüla. Act meyipa repringshitsü nia pusema nungiter. Sorkari yi dokan lapoknür aliba district aser nübortem nem lenmang kar sayutsüla mesüra mongintem aser taoba mapang yi ajemertem aser tang yi toktsürtem dena luden ka shima sorkar len anidaksü nung junger" ta MLA Achumbemo Kikon-ia ashi.

"Juice aser chips ayokba pan dokantem nung yi angur. Asenoki Act agientsü atema inyakyim ka tenzüktsüla aser arogo o civil societies-ia sorkar nem iba mapa inyakangtsü maongka ka agütsütsüla" ta pai ashi.

"Asenoki tang Nagaland nung opinion poll ka agi nung Act agientsüpur nisung teimba asütsü" ta Kikon-isa ashi.

Dr Tsielhoutuo Rhutsho, Dr Shukato A. Sema aser Dr Neisatuo Mero nungeri yi yamajung ajemba ajanga temang nung timtem adokba indang jembir. Külen, Nuklutoshi, Jwenga Se baser T N Mannen nungeri Act agientsü aser kija nem yi ajemtsü mesüra majemtsü shimdakjang ta ashi.

(Maneni tapak 8 nung...)

## Sorkari NHIDCL nem ghonda 72 züingzüksür

**Dimapur, August 27, 2024 (TYO):** Nagaland sorkari NHIDCL nem ghonda 72 tashi nung Sechu-Zubza anentsüh okdoktsü mapang züingzüksüogo.

Mapang agütsüba tsüingda National Highway 29 nung anentsüh alua aliba okdoktsü aser akhi ama traffic senzütsüsa lenmang lapokang ta sorkari tetuyuba agütsü.

Iba lenmang ya state yimtiba Kohima aser tanga district aika atema kanga dang tongtipang lenmang lir ta sorkarisa NHIDCL

dang shiogo. Commissioner & Secretary, Nagaland-i Executive Director (P), National Highways & Infrastructure Development Corporation Limited (NHIDCL), RO-Kohima dang shidi ka nung iba tetuyuba agütsü.

August 26, 2024 nü Chief Secretary, Nagaland Conference Hall nung iba dak sendakba senden ka amendang NHIDCL aser bangdak contractor temi tamakok anguba ajitetogo ta shidi nung shia lir.

(Maneni tapak 8 nung...)

## Nagaland Assembly nung bill 6 benok

**Kohima, August 27, 2024 (TYO):** Mongolbarnü Nagaland Assembly monsoon session mezüing anogo nung government bills 6 benokogo.

Chief Minister Neiphiu Rio-i bill pezü- The Nagaland Goods and Services Tax (Ninth Amendment) Bill, 2024; The Nagaland Work-Charged and Casual Employees Regulation (First Amendment) Bill, 2024, The Nagaland Municipal (Amendment) Bill, 2024 aser "Disqualification on

Ground of Defection in Urban Local Bodies Bill, 2024 benok.

Külen, Deputy Chief Minister T. R. Zeliang-i The Nagaland Road Safety Authority (Second Amendment) Bill, 2024 aser Minister Temjen Imna Along-i The Global Open University Nagaland (Second Amendment) Bill, 2024 benoka liasü.

NLA Speaker Sharingain Longkumer-i Brihostibarnü Bill 6 atema olemteptsü aser agizüktsü metetdaksüogo.

**Kohima, August 27, 2024 (TYO):** Nagaland aser nübortem ajanzüktsü asoshi ali rongsen aser talisa Oil and Natural Gas agiteta agitsüla ta NCP MLA Y. Mhombemo Humtsoe-i ashi.

Mongolbarnü NLA nung 'zero hour' mapang Humtsoe-i iba onük benoka lemsatep.

Changpang Oil Block, ya 12 Sq.kms lir aser iba nung Wokha District kübok Changpang aser Old Tssori Villages dena lir. Küm 51 tejakdang Government of India, Ministry of Petroleum and Natural Gas (MoPNG)-i ONGC (Oil and Natural Gas Corporation) nem iba block agüja liasü ta Humtsoe-i ashi.

"1973 küm parnok nem agütsüba sülen ONGC-i iba Block nung oil wells 31 tupoka ai. 1980 nungi iba Block nungi crude oil agitetsü tenzük aser oil wells 21 nungi high quality crude oil aser 2 nungi gas angu" ta pai ashi.

December 7, 2018 nü MP Tokheho Yephthomi-i asüingdangba ka langzüdang Union Minister of Petroleum & Natural Gas, Dharmendra Pradhan-i 1980

nungi 1994 tashi ONGC-i item oil fields nungi 1.036 Million Metric Tonnes (MMTs) crude oil agiteta liasü ta ashi.

"Ajisüaka, May 1994 nung kaketshir teloktem aser loktitentetemi rongshiba ajanga Nagaland sorkar aser ONGC-i Changpang-Old Tssori Block nung mapa inyakba ajungbena dang anentsüsa aküm" ta NCP MLA Humtsoe-i ashi.

"July 21, 2022 nü Union Minister of State, Ministry of Petroleum and Natural Gas-i Tokheho Yephthomi dang langzüdang Assam aser Nagaland tsüingda Disputed Area Belt nung ONGC-i 2018 nungi 2022 tashi 6,57,432 Metric Tonnes agitet ta shiogo. Iba ya tesüiba nung crude oil jenjang nung royalty bendenra Rs. 3,399.79 Crores shi lir. Iba nungi Assam sorkar nem Rs. 553 Crores royalty agütsür" ta pai ashi.

Assam aser Nagaland nati DAB oil extracting areas nung royalty kasasa lemdi ta shira Nagaland sorkari Rs. 276.50 Crores angutsüla, ta paisa

shisem.

"Asenoki onük kar melemtetba ajanga senotsü tajangzük aika mangur. Asenok ama state tila ka asoshi iba sen ya ngura terenlok mapa inyak inyaktetsü aser lanurtem asoshi mapa inyaksü maongka aika agütsütetsü" ta Humtsoe-isa ashi.

May 1994 nungi tang tashi Changpang Block nungi Nagaland sorkari revenue/royalty akoksabaji sen crore meyirjang aika asütsü, ta paisa shisem.

"ONGC mesüra tanga National oil company kari 1994 nungi tenzükter tesüiba küm 30 tashi exploration & production maparen inyaka aru asübo Changpang oil Block dang masü saka Nagaland nung totzü anguba tesem aika nung mapa inyak tenzükter lila" ta paisa metetdaksü.

"Tsüingremi asenok nem moatsüba ali rongsen tajangzük agitsü atema sorkari merangba nung ali kiburtemia iba mapa inyaksü tejangraba aser sorkar nungitsü terenemba lir" ta MLA Humtsoe-isa ashi.



# PM Shri JNV Mon nung 26th Youth Parliament ali



DEO, Mon L. Moala Aier den JNV ketdangsertem külemi noksa nung angur.

**Dimapur, Luroi/August 27 (TYO):** PM Shri JNV Mon nung 26th Youth Parliament takok ngua August 26, 2024 nü agiogo.

Iba sentong ya Tanmoy Das, PGT Geography & coordinator, Youth Parliament Committee lenisüba kübok agia liasü, kong Mon Town Constituency nungi ex-MLA Yoktin Konyak, District Education Officer, Mon District, L. Moala Aier aser JNV Longleng indang principal Momi Kalita nung dena sentong tali mera ketdaksü.

Principal, Tajber Singh-i tetendangertem pela agizükba o jembia iba sentong tenzüka liasü.

Pai iba sentong nung shilem agirtem ajungmesoa liasü aser iba sülen Yokten Konyak-ia Youth Parliament sentong ya tongtipang lir ta ashi.

Iba sentong nung kaketshir temi ministers, ruling party züngsemtem, opposition lenirtem ama shilem agia ken o balala nung o intepa liasü.

Iba mapang NET scam, Kanchenjunga Express

lendong aser cyber security amala onüktem jembia liasü.

Lok Sabha amener ama parnok amenba mapang kaketshir temi parliamentary inyakyim yimya amshia o intepa liasü.

Iba sentong yagi kaketshirtem lenir akumtsü sempet amshitsü atema sapang agütsür aser democratic yimya tajungba nung angateter.

Iba sentong tembanga Karengmili Timungpi-i melepzüng o jembia liasü.

# AH & VS-i küm ka Paravet Certificate course atema metetdaksü

**Dimapur, Luroi/August 27 (TYO):** College of Veterinary Science & Animal Husbandry, Central Agricultural University, Selesih, Aizawl, Mizoram ajanga küm paid Paravet Certificate course October ita nungi tenzüksü, ta Director, Animal Husbandry & Veterinary Services, Dr. Achila Ao-i sangdong ka ajanga metetdaksü.

Iba course ajanga Basics of Veterinary Anatomy, Veterinary Physiology, Animal Husbandry, Basics of Laboratory

Techniques, Elementary Knowledge of Pharmacy, Basics of Meat & Milk hygiene, Animal Breeding, Basic of Veterinary Medicine, Basic of Veterinary Surgery, Introduction to Veterinary Extension, Animal Welfare, Care of Wild Animals and Administration amala theory aser practical yimyatam awajemtsü.

Iba course agitsü atema minimum qualification ya science stream (English,

Mathematics/Biology, Physics and Chemistry) nung Class 12 renemer alitsüla.

Course atema application ya September 30, 2024 tashi agizüktsü aser course fee aser hostel fee dener course fee ya sen 3,01,140 alitsü.

Jangra aliba candidate temi Email: cvscaizawl@gmail.com, cvscdean@yahoo.co.in, www.cvscauizawl.edu.in/, Tel: (0389) 2362908 ajanga tongteprateptsü akok, ta sangdong ajanga ashi.

# Jakhama nung SBI indang branch office ka lapokogo



Jakhama nung SBI indang branch office ka lapokba sentong nung ketdangsertem tangokba noksa angur.

**Dimapur, Luroi/August 27 (TYO):** State Bank of India (SBI) ajanga Jakhama Town nung August 27, 2024 nü branch office ka semzüka liasü.

Chief General Manager, Guwahati Circle, Sahadevan Radhakrishnan aser Southern Angami Public Organisation tir Er. Tepul Hopovi nati nungshilong ka sayatsü.

CGM Sahadevan Radhakrishnan-i iba sentong nung jembidang, Jakhama branch ya full-fledged branch ka lir, tetetzü iba branch ajanga saving bank accounts tem lapokba kisung masü saka deposit services, investment services, insurance, remittance aser financial recruitment

services, agricultural loans aser students' loans amala agütsütetsü, ta ashi.

Paisa iba branch yagi nüburtem aintsü atema service tulu agütsütsü aser kasa mapang branch aintsü, ta ashi.

Er. Tepul-i o tatsüka jembidang SBI ketdangsür nem tenüngsang agütsü aser parnok alidak SBI branch ka mapang talangka nungi nüngdaka liasü ta ashi.

Pai nüburtem dang bank den yariteptsü aser yangji agütsüba facilities tajungtiba nung amshitsü ayongzük.

Iba bank ya Jakhama Town atema kisung masü saka kidanger yimtsüngtem asoshia lir, ta pai ashi.

Iba sentong nung Youth president, Jakhama, Vishuthazo Kirha-ia jembia liasü.

Iba sentong tenzüka aser Tsüngrem temoatsü meshia Senior Pastor, Jakhama Baptist Church, Rev. Zapovil Sophie-i sarasadem, DGM (B&O) Jorhat Module, Sarabhi Bhattacharya-i pela agizükba o jembi aser Regional Manager RBO Dimapur, Huber A S Wungshim-i melepzüng o jembia liasü.

Iba sentong nung bank ketdangsürtem, SDO (C) Jakhama, Town Committee Jakhama aser Southern Angami nungi village councils chairmen aser lenirtem dena liasü.

# Yanpha Baptist Church pastor dak teka sangshiba aitsür

**Dimapur, Luroi/August 27 (TYO):** NSCN/GPRN (K) Khango telok nung züngsem aser Kiyezu B Village nungi Ahovi'er jabaso Akhekivi-i August 24, 2024 nü Naukhuti jila nung Yanpha Village Baptist Church pastor Rhanlamo Kikon dak prangbong agi tuitar züka merenshiba khukhua aitsür, ta Western Sümi Hoho (WSH) sangdong ka ajanga ashi.

Iba ama tazü mapa inyakba ajanga ozüng maliba aser aibelener memerenshi yutsüba tebilemstü tekeratiba nung bentettsü nüngdakba sayur.

Aibelener nem tapet temerenshi agütsü onoki akhanger, ta WSH sangdong ajanga ashi.

NSCN/GPRN (K) Khango teloki aibelener pua ketdangsür nem agütsüba aser Kiyezu B Village ajanga aibensang yimtsüng nungi jentokba atema pela agizüker ta ashi.

Timtem ajurua alisang Rhanlamo Kikon den onok dena lir aser pa tekeraba nung taneptsü angutsü atema sarasademtsür.

Azüdokshi aser merenshiba yimsü samatsütsü atema asenok ajak lungjemer nokdakti, kechiaser mapa tamajung inyaker atema arütsü maka. Aibelener nem ochi obendang

agütsütsü, yimjung nung alitsü aser kati ka akumtsübotepa ozüng shidak amshitsü asen arok mapa lir, ta WSH sangdong ajanga ashi.

Kuli tejangja makai NSCN (K) Khango telok nungi Akhekivi-i August 24, 2024 nü Yanpha Baptist Church pastor Rhanlamo Kikon dak züka merenshia tepsettsü merangba osang angazüka aoksar, ta Ralan Area Baptist Churches Union (RABCU) sangdong ka ajanga ashi.

Iba ama mapa tamajung inyakba ajanga RABCU pastor tem temulung kanga mejungi yiruogo. Ibai tatok agütsüla mapa masü aser mezügmeshi map aka lir. Tangbo asen state nung tamangba yimsü tsütsü lenir tema kumzüka mali ta angateta temulung shiranger, koba kanga tia maka lir, ta ashi.

Anungji Khrista nung adianu tajungtem, temenen mapa anema raratsü mapang tongogo aser timtem nung aliba nüburtem kumzüka ayutsüla.

Asen Khristan state ka nung iba ama atalokba ya tesasatsü mapang ka lir. Pastor Rhanlamo Kikon dak tim masüba mapa inyakba atema RABCU-i khukhua aitsür aser shidak angatetba senso tajung temi yamai meinyaktsü ayongzük, ta sangdong ajangasa ashi.

# KPC aser DPC ajanga Jack T. Chakhesang asükhu lemsateper

**Kohima, Luroi/August 27 (TYO):** Osangbener tejen aser kakets zülur Jack T. Chakhesang ajungbena Dimapur nung August 27, 2024 nü asüba osang angazüka temulung khurema jashir, ta Kohima Press Club (KPC) sangdong ka ajanga ashi.

Jack T. Chakhesang ya Kohima Press Club indang tembar tajung ka liasü aser pa asüba ajanga ozü takum nung tapok tulu adokdaksür.

Pa osang abenba mapa meinyakdang Indian Army nung tanishir ka liasü aser taoba mapang "The Naga Banner" indang yimo zülur ka ama inyaka liasü.

Asenoki sempet jenti aketba takum ka samaba asoshi mang ayimjang ano pai nisung aika mulungjang nung kongshiba bilemteta temulung anisüngzük, ta KPC sangdong

ajanga ashi. Mangyimer kibong den onoki asükhu lemsateper aser asür tanüla tesunep nung anisüngzükjang ta sarasademtsür, ta sangdong ajangasa ashi.

Dimapur nung August 27 nü osangbener tejen aser kakets zülur Jack T. Chakhesang asüba asoshi mang ayimer, ta Dimapur Press Club (DPC) sangdong ja ajanga ashi.

Jack ya taoba mapang "The Naga Banner" nung yimo zülur ka liasü aser Eastern Mirror aser Northeast Herald den sendaktepa liasü.

Jack-i Nagaland nung osang abenba tsütsü shilem kanga tajung agiogo aser teti bilemtettsü.

DPC ajanga mangyimer kibong den asükhu lemsateper, ta sangdong ajangasa ashi.

# ENNWA lokti senden nung lenir tasen shim

**Dimapur, Luroi/August 27 (TYO):** GPRN/NSCN (Unification) indang Eastern Naga National Workers Association (ENNWA) lokti senden August 27, 2024 nü Khehoi Designated Camp nung mena liasü.

Iba senden ya Ritsa Sangtam, Speaker, National Tatar Hoho lenisüba kübok amen aser President, Gen. Rtd. Neokpao Konyak aser Hothrong Yimkhiung, Member of Collective Leadership nati tajungshi o jembia liasü.

Iba senden nung 2024-2024 kümsük atema ketdangpur

tasen shima liasü. Yimto Yimkhiung ya ENNWA chairman ama shim, Peyao Konyak ya general secretary aser Koitau Phom ya finance secretary ama shima liasü.

Ketdangsür menden yutsür temi team tasenba dang züngsem ajangzüktsü atema jeretpereta inyaktsü ajungshi aser GPRN/NSCN (U) asoshi masetshie nokdaksü ayongzüka liasü.

Senden tembanga Asst. Pastor CHQ, Mankhai Konyak-i anir lokti sarasadem agia liasü.



# Kolkata nung longkak aiterem police-i nokdang



RG Kar Medical College and Hospital nung atalokba anema Mongulbarnü Howrah nung kaketshirtemi Howrah Maidan nungi state secretariat leni jaja aoba senshidaktsütsü atema police temi teargas amshia liasü. Kolkata nung aliba RG Kar Medical College nung azünger arishi küm 31 tain doctor ka August 9 nü tepsetba anema aser iba maparen mechi Chief Minister Mamata Banerjee menden nungi alutsü takhangba agüja Nabanna Abhijan longkak aiterem meindoktsü atema police-i süng, tear gas aser water cannon tem amshia liasü. Police temi tashiyim amshiba mechi BJP-i Bengal nung Bodhbarnü ghonda 12 longkak aittsü sangdongogo.

**Kolkata, Luroi/August 27 (Agencies):** Kolkata nung Mongolbarnü state secretariat-i oyaa aliba longkak aiterem police-i tear gas aser water cannon amshia nokdanga liasü.

Doctor ka dak shi nung tashiyim agi medemba sülen tepseta toktsüba aser tetsürtem tekümsükba kübok metoktsütetba atema West Bengal Chief Minister Mamata Banerjee mapa nungi anentsü khanga longkak aiterem state secretariat-i oa liasü.

Longkak aiteremi police-i tenokdanga balala agütsür aliba rakpoka ia security personnel tem dak long onloktsüba mapang Banerjee la indang secretariat office nung liasü.

“Itangiter osang ajanga nisung kari police tem amaktsü akok ta angazükba sülen onoki personnel noklang ishika aser anti-riot vehicle tem yoka liasü,” ta police officer kati ashi. “Kümdangshia alitsü atema Kona Expressway, Howrah Bridge aser Nabanna temeket nung lenmang aser lane ajak

nung tenokdanga balala tokja liasü,” ta office yagisa shisem. Howrah Bridge nung longkak aiteremi tenokdanga agütsür aliba rakpoka aitsü merangba sülen parnok senshidaktsütsü atema police temi nikongdang 1:00 ako meta mezüng water cannon amshia liasü. Iba sülen longkak aiteremi 1:20 ako meta Santragachhi nung police tem dak long agi aon tenzük aser iba ajanga police temi tear gas khaloktsütsüsa aküm.

Howrah Maidan nung police ka dak kanga mejungi azük aser Santragachhi nung long agi aonba mapang police ka tekolak yirua liasü.

Police superintendent Praveen Tripathi-i ashiba agi, iba lendong nung police kwi yiru aji mejangjai lir. “Onoki longkak aiterem dang national highway azüngtettsütsü mepeshia arudar.”

Police temisa Burrabazar nung steel barricades rakpoka aitba longkak aiterem dak süng agi züka minshia liasü.

Hombarnü longkak aittsü atema ayongzükba sorkari temelaba magütsüi liaka nüburttem Kolkata aser Howrah nungi anüngdang 12:30 ako shi nung telok tilala adenshi tenzük. Police-i, Paschim Banga Chhatra Samaj shirnoki iba longkak aitba sentong ayongzüka liasü, parnok ya political party ka den sendaktepa lir, ta ashi saka koba party nung ali, iba indang meshisem.

Chhatra Samaj lenir Sayan Lahiri-i Hombarnü ashiba agi, iba longkak aitba sentong ya party kecha dena sendaktepa mali, saka pa BJP züngsem ka lir ta shiogo.

“Ni BJP nung dena mali ta ni kodanga shia mali,” ta pai ashi.

Taoba mapang Lok Sabha züngsem Arjun Singh densema BJP lenirtemi Mongolbarnü iba longkak aiba sentong nung shilem agia liasü. BJP state tekolakba Sukanta Majumdar-ia iba longkak aitba sentong ya pusema liasü.

# J&K election: Ganderbal nungi taoba CM Abdullah tokteptsü

**New Delhi, Luroi/August 27 (Agencies):** Taoba mapang Jammu and Kashmir chief minister inyaka alisang Omar Abdullah-i taruba Jammu and Kashmir assembly elections nung Ganderbal constituency nungi tokteptsü.

Ganderbal ya National Conference pur tamendakdak takang ka ama züngshir, kechiyong iba constituency nungi Abdullah'er kinunger putu asem tashi shima aruogo. NC ngutetsang Sheikh Mohammad Abdullah-i iba menden ya 1977 küm akok aser iba sülen par jabaso Farooq Abdullah-i 1983, 1987, aser

1996 küm takok angu. Maneni Omar Abdullah-a iba constituency nungi 2008 küm shima liasü.

2014 küm Sheikh Ishfaq Jabbar-i National Conference ticket bener Ganderbal menden koka liasü. Iba masüadang pa Congress nungi election ana dak tema nung toktep saka takok mongutet.

Jammu and Kashmir state aliba nungi Union Territory kümtsüba atema mepelai Omar Abdullah-i, 2020 küm July 27 nü pa J&K nem state jenjang magütsü tashi election nung metokteptsü ta shia liasü.

(Maneni tapak 7 nung...)

# BJP-i züngsem tasen aniokba inyakyim taruba hopta tenzüktsü

**New Delhi, Luroi/August 27 (Agencies):** Bharatiya Janata Party (BJP)-i Hobarnü nungi tenzüka party nung züngsem tasen züngoksemtsü atema inyakyim tenzüktsü.

Kasa anogo Ato Kilonser Narendra Modi nema pa party nung züngoksemshiba kuli kaket party tir Jagat Prakash Nadda-i agütsütsü

BJP national general secretary Vinod Tawde-i party temzüng ozüng dak ajemdaker ashiba agi, tang party nung züngoksema alirtem inyakyim tasen benoka inyakba mapang züngoksemshitsü nüngdaker.

Tawde-isa, membership drive ya küm pong trok tsüngda khen bosa benoka inyaktsü asoshi Constitution nung shisema lir, ta ashi.

BJP-i linük kübok tesem

balala nungi züngsem tasen million 100 bosa züngoksemtsü atema iba ita nükjidong yuogo. Jammu and Kashmir, Haryana, Maharashtra, aser Jharkhand nung election agitsü aliba state tem dak alaka danga state tem nung züngsem tasen züngoksemtsü atema taruba hopta nung inyakyim benoka inyaktsü.

Iba inyakyim ya shilem balala kuma lemsar September 2 nungi November 10 nü tashi agitsü. Tawde-i ashiba agi, nüburttemi missed call ka ajanga mesüra party indang website mesüra danga digital sabangtem nungi züngoksemtettsü.

2014 küm BJP puri membership drive ayongzüka agiba mapang nisung million 110 shi züngoksem aser 2019 küm nisung million 70 shi züngoksema liasü.

# Mayawati ano BSP national tir kümogo

**New Delhi, Luroi/August 27 (Agencies):** Mongolbarnü Bahujan Samaj Party senden ka amenba mapang Mayawati tanaben party indang national tir asütsü ajaki mulunga agizüka shimogo.

Iba senden nung BSP central executive committee, national aser state jenjang nung ketdangpur tejentem aser linük kübok tesem balala nungi lenirtemi shilem agia liasü.

Arishi küm 68 tain lenir shibai Uttar Pradesh chief minister mapa pezüben tashi benogo, la ya küm 20 tejakdang BSP ngutetsang Kanshi Ram melena shima liasü.

Party sangdong ka ajanga ashiba agi, Mayawati-i la busemertem dang BSP movement ajanga nüburttem atema aser talisa Dalit, Adivasi, aser OBC loktitem atema taküm bendanga agüja inyaktsü la renemer aliba metetdaksüogo

La tanaben meshim tsüngda anogo ana tejakdang Mayawati-i social media ajanga la yimden yimsüsüba nungi anentsübabo kecha tebilemba mali ta shia liasü.

Mongolbarnü party workers tem den jembiba mapang, Dr Bhimrao Ambedkar-i bahujans tem pei sasa pei akumtsüboa aser meranga aser ochishia inyaktsü atema tenzükba movement tang asendenshir tajungba kuma odar aser iba movement nükjidong nungi matsüngshitettsü, ta lai ashi.

Mayawati-isa Congress aser BJP na atitsü aser ashiba agi, iba national party ana yagi linük nung lokti nung nütsüng agi ajema aliba telok aser backward loktitem atema chichia minyakttsür.

“Taoba mapang Congress anema nokdakba ama linük nung yimden yimsüsübaren melena tang BJP anema nokdaker, ajisüaka party anaprongla aser parnok den sendaktepa aliba party temi bahujan, Dalit, adivasi, OBC, Muslim aser danga tamangba yimsü dak amangertem atema süoki ia minyaker aser minyaktettsü, kechiyong bahujan pur atema parnok tebilemba kanga temesü lir,” ta Mayawati-i ashi.



Ahmedabad nung tzünglu kanga sashia aruba ajanga tzü agi lenmang mubanger alidak tetsür temi auto rikshaw ka anungba noksa nung angur. Gujarat atema IMD ajanga 'red alert' sangdonga lir, aser tzünglu kanga sashia aruba ajanga yimti balala nung tzümetsüng adok amai lir. Ahmedabad, Vadodara aser danga yimtitem nung tzü yimzüka moteti atsüngtetba ajanga gari junga mesenzüteti lir.





## TIR YIMYIM YIMOBILEM (EDITORIAL)

DIMAPUR RASEMNÜ, AUGUST (LUROI) 28, 2024

### Senso akümba

**T**awa asen lima nung Aor masü ser nung Aor tenüng aser Aor kin kidong amshia nisung kati maksütsü mapa tamajung inyakba agi Ao kin nem tenüngmenük bener arutsüba sülen, tarutsü nung tzümalongmartem nem mashimashi Aor tenüng aser Aor senso temeten agütsüba ajanga Ao kin memenendaksüi, Aor sobaliba aser temeten wazüka ayutsü asoshi Aor masüba tzümalongmar aser Aotsür tangar kin den kibalembuba nungi jakzükba chirnurtem shinga nema Ao senso temeten magütsütsü asoshi Ao Sendeni yimyim ka nenshia ayimotsükba ajaki angashir alitsü imlar. Iba yimyim ya Ao kin asoshi bentetbenteta mapa küma aotsüba sobaliba tongtibang ka asütsü. Iba yagi asen lima nung menua melii sensopurtemang tangar kilir akümtsüba tensa tia nungi kümzüksü. Atangji, tanü alima ajunga agi yim ka ama kümer aliba putu ka nung, kibalembubaren nung kanga meyoktepa kümogo. Iba jagi asenoka tangar kin küma aoer aser tangar nisunga asen kin küma aotsüsa akümer, aji oda Aor masüba agi Aor akümba purtem aika lir. Iba jagi, tanübo asenoki bener arua mesütetba tzümalongmartem aika asen kin aser asen kidong kümer yimten nung aser lokti nung tongti shilem agiba asenoki angur. Ano, talisa tzümalongmar keyiia aoba Aotsürtemi asoba chirnurtema aika Aor tenüng dang masü saka Ao senso kümer Aor senso telongjem nung tongti shilem agiba asenoki angur. Ashiko, parnokji Ao senso akümba agi Scheduled Tribe kümer, asenok melen parnokang maongka aser temoatsü tuluba agia alitsüa akok. Tanübo item Aor masü ser nung Aor akümba purtemi tenüngmenük bener arutsüba mapang dang asenoki senso masü kümdaktsür saka tenüngmenük bener marutsüra asenoki mashishir. Yimten nungbo ibaji teindang mapa masü. Tanü ibaji bentetsüba mapang tongogo. Asenoki asen sobaliba aser asen yimli kümzüka yunüyonga, tanü putu nung shinga nema senso magütsütsü ta asüba yimyimji mapa küma inyaksü kanga tasak asütsü. Ano, asenoki bilemdangtsüba kaji, asenokbo senso temeten ya yimtsüng nungi tenzüker, anungji yim kati par yimtak kibong ka nung inetba mesüra tzümarlongmar asüyonga par yimtsüri asoba nisung ka nem par yim senso aser par tebu tayim kidong tenüng agütsüra, iba jagi pa mesüra laji Ao senso temeten ngua adoker aser asenokia mashishir. Tanü asenok senso akümbaren nung asen yimten aser lokti tensa tiagi yangji odagi. Atangji, asen tsürabur sobaliba nunga tangar bendangertembo senso mekümdaktsütsü mesüra asen den tebu yima alir bendanger nembo senso temeten magütsütsü ta masü saka talisa tebu yima arua alirtem nembo senso temeten agüja pei yimer aser pei kin kidong kümdaktsüba asenok yimtsüngtem aika nung alitsü. Itemji mesüka tanü asen putu nunga asen dak apet tangar bendanger aser talisa Aotsürtemi asoba chirnurtem nem parnokki dang kümnüra, asen kin senso temeten agütsütsüba ozüng aser inyakyim, Adoption law, telatet tejangja ka alitsü nüngdaker. Ibajibo asen Aor kija atema masü saka Naga nunger inti atema Nagaland nung 'Nagaland Citizenship & Adoption Act' ka Nagaland Assembly nung latetsü kanga rongdak nüngdaka kümogo. Asenoka US nung sora mesüra US nung küm pungo danga lira mesüra US nunger den kibong kümer par lima nung küm asem danga lira American nunger senso kümtsüba amato, asenok temzüng ozüng jagia tzümarlongmartema Ao senso mesüra Naga senso kümteetsüsa inyakyim tebentet aser teindang alitsüla. Tanübo, kodang koma Ao senso akümar memetet aser mejangjaba Aor masüba agi Aor senso akümba purtem jenti lir. Itemji junga alinü tashibo kecha masü saka majung alinü, tang amaji, Aor masü akümer. Ajisuaka, kodang yimten temzüng ozüng ka ajanga Ao senso kümdir, junga alinü dang masü saka mejungi alinüa Aor sensosa asütsü. Atangji, asenoki alima nung shingaia Aor tenüng majatsü tabo mesütetsü saka Aor masüba nisung ka Ao kin senso akümtsüabajibo Ao kin dak tashi alitsüsa tashi angudak temzüng ozüng tejangja ka alitsüsa yimten yimsüsürtemi temulung agüja inyaksüla.

## OLEMSABANG

### LANUR MAPA MANGUBA TEBILEMETSÜ YA MAPA MEINYAKNUBA AGI ADOKBA LIR

~ L.Kika Pongener.

Asen Naga lima nung lanur zünger mapa manguba tebilemetsü (Educated un-employed) ya kanga ulura kümogo. Kibong nung tsürabur tebilemetsü khuret tulutibaji, chirnur mapa bushitsütsüba iba ya lir. Naga nunger kibong aika nung tsürabur aika iba khuret jagi nenneter shisabulur. Atangji, chirnurtem, Assam-India lima jila tulu nung oa sen lakh aika endoka 'Education Degree' tulu ngua zünger arua, tsürabur nem khuret agüja, kecha mapa maka kidang dang kazüa alir aika lir. Surabangla, Degree tulu ngua azüngbaji kechi tajangzük...??? Asen Naga nunger lanur tazünger ajaki Sorkar mapa (White color job) dang inyaknur. Ajisuaka, lanur tazünger ajunga nem sorkar mapa agibo ataa kodanga magütsütetsü. Anungji iba tebilemetsü ya kibongtem atema dang masü, Sorkar nungi tenzüker yimden, arogo aser loktiliba ajunga asoshi tebilemetsü tulu asütsü. Asenoki jungjunga shisadanga, asen lima nung mapa manguba tebilemetsü ya mapa makaba agi masü, saka mapa meinyaknuba agi adokba asütsü. Kechiba sura asen lima nung tzümartem mapa inyakera meinyakmai inyaka takar akümer, saka asenok lisopurbo mapa maka kazüteper.

Anungji iba jenjang nung yasa maneni lia aonungbo, putu ka nungbo asen lima nung tzümartem kibur akümtsü aser asenok lisopur parnoklar akümtsü. Naga lima jila ajunga nung shishilempaba mapatong (Business establishment) tongtoret ajunga tzümar nem ajepbangdaksüogo. Aji oda, mapang memenuadok asen Naga nunger tenuk saaka mapa kar meinyakra kanga menuadoker alitsü. Anungji Naga Student Federation-i anir, Student Union aser Lanur Telongjem Unit ajaki iba ya khen suoki yia shisadangtsü mapang kati menepogo. Aji oda, khenyongi mapatong ajunga takok angutsü memerangtsü, saka meilungi tapet mera agia shishilempaba mapatong tongtoret kar-kar danga asen Naga nunger lisopur keti bener arutsü lenmang bushitsüla. Aji oda, mesura putu ka nungbo asen lima nung asenok tzümar küpok alar asütsü. Ano asen Naga nunger-ia kisu-jensu mapa ya temulong agüja inyaksüla, asen Naga nunger takartem aika kisu-jensu mapa nung Bihari, Tiswali, Miya nunger Dekhadar, Mistri, Jugali nem sen merijang/lakh kwika agütsür...??? Asen lima nung tazüngertemi inyaktetsüba mapa aika lir aser mazüngertemi inyaktetsüba mapa aika dang lir. Asen lima nung lanur mapa manguba tebilemetsü ya mapa makaba agi masü saka azümesenba agi mapa makarba dang lir.

Naga lima nung tanga jila-tem khen yutsür, Dimapur jila nung danga osettsüset/chiyungtsü ajunga nung Wholesaler/Agent/Dealer ajak bushidanga ora, asen Naga nunger rongnung Sumi nunger kar dak alaka, tzümartemi ajak ajepbanga lir. Tanü asen lima nung lanur karbo tzümar lapokba Dokan nung 'Salesmen' inyakdagi ajia kanga junger. Ajisuaka, asen Naga nunger lanur tazüngertemi osettsüset/chiyungtsü ajak nung Wholesaler/Agent/Dealer mapa ya inyaksüla. Second-hand suoshi nunga Wholesaler/Agen/Dealer kar lir aser Dokan amenertem ya parnok nungi alizüker shishir. Surabangla, asen Naga nunger, talisa, asen Aotsür Aor-ia iba mapaji inyaksü koka dang lir. Aser Wholesaler dang masü Second-hand ayokba Dokan ya asen Naga nunger-ia lapoktsüla. Dimapur nung Hongkong Market & Hazi Park nung Dokan shishir ajak ya Tibetan/Bengali nisung teimba lir, aser asen lima nung Dokan shishia takar akümer. Surabangla, asen Naga nunger-ia ajibo akoktsü masü na...??? Ano Mobile Phone ayokba Dokan ya-a asen Naga nunger-ia lapoktsüla. Asen lima nung tzümar aika ayung-ayunga akümpok nung mener shishilempaba mapa agi takar akümer, saka asen Naga nunger lanurtembo aika mapa inyaksü maka amajok nung mapang endoka kazüteper.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Uganda nung Muslim extremists temi Khristan ka tepset

**Nairobi, Luroi/August 27 (Agencies):** Uganda anüdoklen Muslim yimsü kanga metsünga-reta amshirtemi noklang-nok amshia August 19, 2024 nü Khristan ka tepset, shibai Muslim nunger Khrista dangi anir arua liasü.

Yowabu Sebakaki ya bicycle nung mener Budaka District kübok Nyanza North Zone, Nyanza Parish, Mugiti Sub-County nung par Nyanza yimtsüngi meyipa shilangba mapang iba lendong ya ajurua liasü. Pa arishi küm 52 liasü.

June aser July ita Muslim nunger temi Sebakaki dangi amokmerena messages tem yoka liasü aser message ka nung “Nai miimshia senden ayongzükba onoki meteta lir. Nai sayutsüngiba aser ozü Muslim nungertem Khristan yimsü agizükdaktsüba anentsüla, aser nai yamaji meinyakra onoki yakta nü takum agitsü,” ta shia liasü, ta pa kinungtsü Nambaluka Sebakaki-i ashi.

Khristanpur ka kidang temulung meyiper atema nikongdang 5:45 ako nung discipleship class agiba sülen Sebakaki ya David Nkombai pa indang bicycle nung par kidangi meinoktsürba liasü.

“Par ki atongtsü kilometre pongu dang lia nikongdang 6:20 ako meta motorcycle ka onok sülen aru aser idangjisa Sebakaki dak tesülen nungi

tekong anasa Somali nungeri amshiba noklang-nok agi alep,” ta Nkombai Morning Star News dang ashi.

“Pa tsük aser ano noklang-nok kati pa tekolak nung alep. Azü kanga yimdokba ajanga Sebakaki-i nisung memeteti akum.”

Iba mapang Nkombai pa indang bicycle nungi alua liasü.

“Lendong agütsür temi ‘Nü mapang tongogo, aser na kumzüktsü atema ner Tsüngrem dang sarasademang – asüba sülen Yisu-i takum agütsür ta nai nüburttem ashiokja arur’ ta ayimtena liasü,” ta Nkombai ashi.

“Ni bicycle nungi alu aser Sebakaki dak teka sangshirtem rongnung Rashid Siriman jangjatet, shiba Mbale nungi radical Muslim lanur tejangja ka liasü.”

Kiyongertem adenshia Sebakaki ya Mbale nung aliba mozüki kati anir ao saka lenmang nung lia asü, ta pa kinungtsü ashi.

Budaka nung aliba police temi iba lendong agütsürtem bushiba mapang lir.

Sebakaki ya apologetics nung training agir liasü aser pa ya Muslim nunger timba aliba Dhoho, Namatala, Kamonkoli, Sekulo aser Mugiti tesemtem nung sayutsüngia jaja liasü, ta pa indang pastor-i ashi.

January ita Kamonkoli nung alidang pai Islamic scholars tem den o intepba mapang kanga junga jembiba sülen Muslim extremists temi tepsettsü meranga lasü, ta iba pastor yagi security mechi pa tenüng magütsü ashi.

“Radical Muslim nunger temi Sebakaki apu aser osettsüset techira agi pa dak azük tenzük, saka iba sentong nung dena aliba Khristan temi pa kumzük,” ta pastor-i ashi.

“Iba sülen pai Muslim scholars tem den o intepba nung shilem magi saka moapu nung sayutsüngi tenzük aser discipleship class tenzüka liasü.”

Sebakaki-i Budaka District kübok Kamonkoli aser Ikiki jila kar nung moapu nung sentong ayongzüka liasü, ta pai ashi.

Uganda nung Khristanpur reshikangshia amshiba jenti atalokba Morning Star News ajanga kuli bendenba rongnung iba ya tasenba alitsü.

Uganda indang constitution aser danga ozüng temi nisung ka indang tamangba yimsü dangar dang sayutsü aser tamangba yimsü ka nungi kati meyiptsü densema tamangba yimsü temeden agüja lir.

Iba linük nütüng yongsük shilem 12 dak tema Muslim nungertem lir aser timba linük anüdoklen alir.

## ANOGO ABEN TSÜNGREM DEN

### Aonung Shilem

T.Ken 134:1-3

Doctors aser nursetem mozü kidang aonung inyaksü lemezüktsür. Sepoy, police aonung parnok alidak lemezüktsür. Kodang aonung kija mapa nung noktaker azüngmeyaka bilemer, idangji T.Ken 134ji bilemtetang.

Tsüngrem kodanga manüner mesüra memejanger. Anungji, asenoki mapang ajak nung Pa tenzüktsü aser tushitsü akok. Ken züluri ashir idakji Tsüngrem kidang aonung aser anüngdang Tsüngrem dang sarasademtsü aser Pa tushitsü putirtemi lir. Tekülemdak maneni tekülemdak nungi tenüng asangba aser sarasademba liasü.

Asenoki aonung mapang nunga Tsüngrem moatsütsü akok. Taküm nung asenoki aonung timtem ajanga aodang Tsüngrem tenüng asangtsübaji temela masü. Saka Pai asenok nem aonung ken agütsür. Paul aser Sila Filipi tepuokdak Tsüngrem tenüng asangtsü koka liasü (T.M.16). Parnok aonung shilem (shift) nung liasü. Tsüngrem saka lir ta parnoki metetta liasü, aser Tsüngremi teyari yok. Pai parnok tepuokdak nungi anitet. Asenoki aonung mapang memetetba temoatsütem angutsü akok, kechiaser Tsüngremi leman balala nungi asenok den jembir.

Tangari nai aonung tenüng asangba mangutsü akok, saka Tsüngremibo angashir aser angur.

Na anüngdang mesüra aonung liang, nai anüngdang süang mesüra aonung tenzükang, nai Kibuba tenzükera ta bilemtetang. Kechiaser pai kodanga memejanger, Pai ne sarasadem aser tenüng asangba mapang ajak nung angashir, aser Pai na moatsütsü.

## Ukraine-i Russia den sendaktepa aliba arogo nokdangba atema Pope Francis-i bilemetsür

**Rome, Luroi/August 27 (Agencies):** Akhi mapang Russian Orthodox Church den sendaktepa aliba telok tem nokdangtsü atema Ukraine nung ozüng tasen ka benokba atema Pope Francis-i tebilemetsü akaba lemsatepogo aser ibai tamangba yimsü temeden anema lir ta ashi.

Deobarnü Roman Catholic Church tekolakbai sangdong ka nung Orthodox arogotem dak sendakba nung tawa Ukraine nung ozüng tasen yangluba atema bilemer, ta shia liasü.

“Sarasademer temeden asoshi ni tsüboa bilemer, kechiaser ochi nung sarasademer temi teti ajak atema sarasademer,” ta Francis-i ashi.

“Nisung kati sarasademba mechi temenen memenar.”

“Nisung kari par nisung anema mapa tamajung inyakra, iba atema pa tai asütsü, saka pai sarasadenya agibo temenen memenatsü. Anungji sarasademner nem pei mulungba Arogo nung sarasademtsü melatsüla. Imlibilema Khristan Arogo kata indang-indanga süang mesüra



meindangia süang, tenokdang. Arogo ya kongshitsüba masü!” ta pai ashi.

Honibarnü Ukraine Tir Volodymyr Zelensky-i ozüng ka nung meyongnem agütsüba ajanga Russia den sendaktep aliba telok tem nokdang, aser ibai national security mera nung shilem ka lir ta ashir.

Iba ozüng yagi Ukrainian Orthodox Church tem nokdang, koba akhi mapang

nungi Moscow patriarch den tesendaktep lir, saka parnoki rara mechi May 2022 nung tesendaktep yanglua alirtem rakdang ta sangdong.

Tenokdangba tasenba yagi Ukraine indang Orthodox Church nung mokongshir, koba 2019 küm alima nung Orthodox Church lenir timbai agizük aser iba nungya Russia nunger teka mali.

“Tanü Ukrainian orthodoxy

ya Moscow indang temenen nungi nüchi angutsü atema mera agir,” ta Zelensky-i Honibar nikongdang sangdonga liasü.

Ozüng tasenba ya ajanga UOC amala entities tem Russia den tesendaktep rakdangtsü ita toku agütsütsü mesüra shibangtsütsü. UOC ya technical tsütsü 2022 küm tesendaktep rakdangogo, ajisüaka Ukraine ketdangtsür

temi tesendaktep tang tashi lir ta ashir.

Russia-i 2022 küm nungi Ukraine amak tenzükera UOC den sendaktepa aliba putir aser facilities temi Russia nunger bhukuma olulu prokshir ta tai tonglokttsüba temai adoka lir.

Taoba hopta Ukraine indang Legislature Verkhovna Rada ajanga bill ya agizük aser ozüng yanglur Iryna Herashchenko-i iba ya otsü yangluba vote ka lir aser Ukraine nung linük anema inyakba kongsangtem nokdangba lir ta ashi.

Discovery Institute’s Center on Human Exceptionalism mendenpuba Wesley J. Smith-ibo ozüng tasenba yagi arogotem indang tamangba yimsü temeden nung aibelener ta ashir.

“Ukrainian Orthodox Church mesüra Orthodox Church of Ukraine ya Ukrainian Orthodoxy tenüng nung nokdaka ali asü maliar ajibo Orthodox Church ajanga bentettsüla,” ta Smith-i National Review nung zülua liasü.

“Ajisüaka Ukraine sorkari telemtetba magitsüla aser menokdangtsüla.”



AO OSHI ANGAZÜKDAK: TANÜ ANGAZÜKTSÜBA OJANG



Tamaren (n) akhüm tulu, sentsü twangshi (honourable, dignify) \* Tamaren nisung nem nebortemi akhüm agütsür. Tamarener (n) yimten tashi tulu aketba yimsüsür (noble) \* Tamarener aikati Tsüngrem temeim amadoker.

OLONG PAITEP # 6908

Grid for Olong Paitep # 6908 with numbers 1-15 in various positions.

TIPIEN and LANGTSÜNGLEN lists with 16 items each.

OLONG PAITEP # 6907 TELANGZÜBA

TIPIEN and LANGTSÜNGLEN lists for Olong Paitep # 6907.

NAI-A YA METETTER MA

Table listing Nagaland Nung Governor 1963 to 2023 with names and dates.

Amit Shah dang international borders atsü dangtsü ayongzük



Itanagar, August 27, 2024 (Agencies): Arunachal Pradesh minister Mama Natung-i Union Home Minister Amit Shah dang state nung international borders atsü dangtsü atema ayongzükogo. Arunachal Pradesh-i Bhutan den kilometer 160, China den kilometer 1,080 aser 1,080 den kilometer 440 agi arstsütepa lir. "Tanü Union Home Minister

Amit Shah den par kidang ajurutepogo aser inter-state check gates o international borders nung atsü atsü dangtsü osang lemsatep. Union Home Ministry dangi State Police tashi itshtitsü atema TCL 2.0 package shidangogo" ta Mama Natung-i metetdaksü. "Arunachal Pradesh nung nisungtem ozüing alema aruba, mozü shibelenba, telungpur

inyaksangshi aser ozüing alema arstsü adena senzüba noktangtsü atema international borders atsü dangtsüla" ta pai ashi. Natung-i Amit Shah dang Bangladesh nung tensa mejungi akümba sülen check gates nung mapa akangshiba aser inner line permits reprangba den e-ILP den Aadhaar card sendaktepba inyakyim tenzükba osangtem lemsatepa liasü. Timtem aliba Tirap Changlang Longding (TCL) districts atema Nadung-isa Union Home minister nem package 2.0 action plan agütsü. TCL 1.0 package ajanga state police tashi itshidaktsür aliba nung yarisemtsü atema TCL 2.0 proposal agütsür. Iba ajanga infrastructures, mobility aser equipment ajungkettsü ta pai ashi. Amit Shah-ia iba tebilemba reprangdangtsü aser telangzüba tajung agütsütsü nangzük.

Manipur SSP-i Governor den Thoubal district tensa osang lemsatep

Imphal, August 27, 2024 (Agencies): Manipur kübok Thoubal district nung Senior Superintendent of Police (SSP) Rakesh Balwal-i August 27 nü Manipur Governor C H Vijayashankar den ajurutep aser district nung security tensa osang lemsatep. Thoubal district nung alirtem kümzüka ayutsü atema mapa balala inyakdar ta Balwal-i Governor Vijayashankar dang ashi. Kisan Morcha, Ukhrul district President Mayonpam Gachui-ia tanü Manipur Governor den ajurutep aser Ukhrul district nung alirtemi timtem balala ajuruba osang lemsatep.

Ukhrul district nung connectivity, infrastructure, education aser healthcare sectors nung timtem aika lir ta pai Governor dang ashi. "Imphal-Ukhrul lenmang kanga majungba ajanga district nung alirtem rongsenketzung nung kongshir. Iba ama tensa ka nung Governor-i district semdangtsüla aser asadangtsüla" ta Mayonpam Gachui-i ashi. Idangji Governor Vijayashankar-i September tom nung Imphal district semdangtsü aser tensa asadangtsü nangzük. Manipur Amateur Boxing Association (AMBA)-ia Manipur Governor den ajurutep aser

September 29 nü 2nd Governors Cub Boxing Championship nung tongti tesemdanger asütsü asüingdang. Manipur Governor-i AMBA ketdangpur nem Rs 1,00,000 (one lakh) cheque ka agütsü aser Manipur nung saisapong renlokdaaktsütsü asoshi Raj Bhavan-i akokba tashi yaritsü nangzük. Governor Vijayashankar-isa N. Robash Meitei aser L. Bidya Devi nati ASBC Asian School Boys and Girls Boxing Championship nung Indian Boxing Contingents tenung nung shilem agitsü aliba atema tenüngsang agütsü.

Mizoram Speaker'er bungalow yanglushiba nung sen aika endokba aitsür

Aizawl, August 27, 2024 (Agencies): Mizoram Legislative Assembly nung Speaker Lalbiakzama-i par bungalow yanglushiba nung sen aika endokba aitsür ta Mizo National Front (MNF)-i metetdaksü. "Mizoram PWD Building Division nungi RTI Act reply ka nung Assembly Speaker Lalbiakzama-i par bungalow yanglushiba nung Rs. 23,40,000, building renovation nung Rs 8,40,000 aser furniture alisemba nung Rs. 15 lakhs endokba shia lir" ta MNF Media & Publicity Department Secretary Lallenmawia Jongte-i ashi.

Rs 8,40,000 endokba nung interior painting atema Rs. 4,78,401, exterior painting atema Rs. 1,95,513, veranda ceiling work atema Rs. 98,118 aser petty & sanitary works atema Rs. 67,968 endok ta Jongte-i ashi. Ano, furniture aser home appliances aliba nung Rs. 15 lakhs endok aser iba nung king-size beds, dining tables, chests, tables, showcases, almirahs amala dena lir ta paisa ashi. "ZPM-i election atema nüboyimjang nangzükba ama meinyaker. Assembly election nung takok anguba sülen Chief Minister-i mezüngbuba osangbener senden amendang

bungalows yanglushiba nung sen aika endokba magizük ta shia liasü" ta Jongte-i metetdaksü. "ZPM-i year of consolidation ta sangdonger sen aangtsü mapa inyakba mapang ka nung Speaker-i par bungalow yanglushiba nung Rs 23 lakhs tema endokba atema sasaa bilemer. Tanga Minister aser MLA temia parnok bungalow yanglushidar" ta paisa shisem. "ZPM party-i par Minister aser MLA tem asoshi sen aika endoker saka state nung senotsü maliba ajanga lenmangtem anepalu mesüteter" ta MNF tanishir Lallenmawia Jongte-isa ashi.



Assam Rifles-i Agartala kübok Salbagan nung nisung ka ket nungi Rs 19.2 crore alang Yaba süngjang 1,20,000 apuba sülen agiba noksa angur. Osang tejangja ka angazükba nung ajemdaker Assam Rifles-i mita odang Bolero gari ka nung mozü bena aliba apu. Parnoki apuba nisung den mozü aser gari ajak Tripura Police ket nung agütsüogo.



# Israel mitkari Gaza nung Hamas-i pua alir ka kumzükogo

**Jerusalem, Luroi/August 27 (Agencies):** Israel indang special forces temi Gaza Strip south tsütsü longpok ka nung rescue operation tebenja ka agiba mapang Israel nunger ka pua aliba kumzükogo, ta Israel-i ashir aser iba rara tenzüker ita 11 buba nung oaka yimjung alitsü teimla mangur.

Arushi küm 52 tain Bedouin nunger Kaid Farhan al-Kadi ya Palestine nunger Hamas teloki October 7 nü Israel amakdang pua bener oa liasü, ta mitkari Mongulbarnü sangdong ka nung ashi.

Al-Kadi ya "stable medical condition" nung lir aser temang reprangtsü atema mozüki kati anir ogo, ta mitkari ashi.

Al-Kadi ya Rahat nung alir, koba Arab nunger timba aliba jila ka lir. October 7 nü pa ya Israel south tsütsü warehouse ka nung tanüker ama inyaka alidang Hamas-i yariba fighters temi nisung 250 shi den külemi apu. Iba mapang civilian timba sür nisung 1,100 dak tema tepset ta Israel-i ashir.

Israel-i October 7 nü nungi tenzüka Gaza amakba mapang Palestine nunger 40,000 dak tema tepsetogo aser yangji aliba nütsüng yongsük 2.3 million nungi shilem 90 pei ki yutsür tesem balala nung

jenshia lir aser nisung aika khen atema yangluba süki nung alir. "Pua alirtem ajak pei kidangi anir arutsü atema onoki maongka ajak bushir," ta Israeli Defence Minister Yoav Gallant-i social media sapang X nung ashi.

Hamas telok yagi tang tashi nisung 110 shi mechioki yua lir, aser parnok shilem asem shi süogo ta amanger. Tanünga nisungtem taoba küm November ita ceasefire mapang Israel nungeri tepuokdak yua aliba Palestine nunger den melentep.

June ita Israel sepaitemi Gaza kübok Nuseirat refugee camp nung pua alir nisung pezü kumzükdang Palestine nunger 274 tepset aser 700 jungnüa yirutsü.

Israel-i tayimtsü amshia amakdang pua alir aika tepsetogo ta Hamas-i ashi, saka parnok tasü mang bener maruteter. December ita pua alirtem jena aodang Israel sepaitemi aibelena Israel nunger asem tepset.

Kasa mapang Egypt, Qatar aser United States nungi lenirtemi tanünga pua alirtem chioktsü aser iba melena Gaza Strip nung ceasefire alitsü atema ita aika jembishinüa arutar.

Hamas-i pua alirtem chiokba melena teti asoshi ceasefire alitsü, Israel sepaitem Gaza nungi ainshitsü aser Palestine nunger tepuokdak alir aika chiokdaktüner.

Mongulbarnü iba operation ya Gaza south tsütsü Rafah jila nung Egypt den arutsü anasa agi, ta osangbener kati ashi.

Israel-i iba border crossing amokbangner, kechiaser ibaji ajanga Israel nem tashi balaka agütsütsü aser ceasefire atema jembiba nunga iba tesem nung rangloker, ta osangbeneri ashi.

Israel military operations nung pua alir nisung tenet mesüra ti dang kumzükogo aser November ita ceasefire nung nisung 105 chiok, ta pai ashi.

Nai temulung agütsür aser nai item nisungtem anir aruner ta kuli sayunera, ceasefire ya dang teimla lenmangji lir, ta osangbeneri ashi.

"Ajisüaka jembishinüba tsütsü Netanyahu aser par coalition tem tesüleni atsüngzüka aor. Parnoki azüdokshi ang tali bushir... Tang parnoki nüburtem den Gaza tanaben amokbangtsü atema jembir. Aser Hamas aser international community atema tebilemtsü tulutibaji aji lir."

# Russia-i missiles, drones amshia Ukraine amaker

**Kyiv, Luroi/August 27 (Agencies):** Russia-i aonung drone aser missile amshia Ukraine tesem balala amakdang nisung pezü süogo, ta Tir Volodymyr Zelenskyy-i Mongulbarnü ashi. Linük tesem ajungalen energy facilities tem kanga sashia maker anogo ka lir iba osang ya angashir.

Zelenskyy-i ashiba agi, Russia nungeri drones 81 aser cruise aser ballistic missiles tem amshia amak aser nisung 16 yiru. Pai nisung pezü ya kong asüar mashi, saka industry balala aliba Kryvyi Rih jila nung nisung aliba ki ka amakba nung nisung ana asü, ta iba yimti indang military administration tekolakba Oleksandr Vilkul-i ashi.

"Asenoki iba aser danga mapang amakba atema Russia nem telangzüba agütsütsü. Nisung meimchir anema mapa tamajung inyakba memerenshi metoktsütsü," ta Zelenskyy-i social media sapang X nung zülutsü.

Hombarnü amakba sülen

power line raksatsür aliba Kyiv region nung aonung 'air alerts' ola ponguben agüja liasü. Air defenses ajanga drones aser missiles ajak raksatsü saka item oset teraksa tsükba ajanga morok mi adok, ta regional administration ajanga ashi.

Hombarnü Ukraine tesem balala nung missiles 100 dak tema aser drones kasashi amshia amakba sülen Ato Kilonser Denys Shmyhal-i "Russian kiralongrar temi ano maneni energy infrastructure nung tenük yoker," ta ashi aser Ukraine tembar linüktem dang long-range nok-nü agütsütsü aser itemji Russia linük telung nung amshitsü temelaba agütsütsü shia liasü.

Russia-i Hombarnü energy infrastructure amakba ya taoksatsüka mapa tamajung inyakba lir ta US Tir Joe Biden-i ashi aser Ukraine dangi mezüng yoktsü atema US air defense export repringshitsü ta ashi. Systems yanglushitsü aser Ukraine indang energy grid

tashi itshitsü atema US-i Ukraine dangi energy equipment tali yoker ta pai shia liasü.

Russian Defense Ministry ajanga "long-range precision air-and sea-based weapons" aser strike drones amshia Ukraine indang military-industrial complex yariba tongtipang energy infrastructure facilities amak ta ashi. "Shimteta aliba targets ajanga nung kongshio," ta ashi.

Russia ketdangsürtemi ashiba agi, Kursk region nung Ukraine indang missiles pezü khazüka yok, kong Russian sepaitemi Ukraine sepaitem den rarar, shirnok tan ita ajungbena alinük atsünga aita liasü.

Iba region nung raraba ajanga yangji aliba nuclear power plant ka atema tebilemtsü lir. Iba plant semdangtsü atema International Atomic Energy Agency tekolakba Rafael Grossi Mongulbarnü Kursk region tonga arua lir, ta Russian news agency temi ashir.

OFFICE OF THE  
**CHANGTONGYA KAKETSHIR TELUNGJEM**  
 P.O. CHANGTONGYA-798613, DIST-MOKOKCHUNG  
 Regd. No. 908  
 "Alizüng Atongtsü Asoshi"

**TENÜNGSANG AGÜTSÜR**



Changtongya Kaketshirtem rongnungi Mr. Nungsanglemba Lkr & Mrs. Merenla Imsong jabaso Sb. Longpok N Longkumer ajanga July 18, 2024 anogo Chartered Certified Accountant jenjang tulu nguteta Association of Chartered Certified Accounts (ACCA) züngsem kümtetba asoshi tenüngsang aser tetushi agütsür.

Tsüngremi maneni pa taküm lenmang ajak nung takok aser temoatsüma nung len aniangma ta sarasademtsür.

Sd/- Sashilemba, Gen. Secretary      Sd/- Arensashi, President

**SÜR KÜM 10 AJUNGBA BILEMTETER**  
**Asür Tsükjemtola (Dibuia)**




28th August 2014

Küm ter süyigo, tebour tajung tanüla ka Kibuba den alitsü ao, aser ozü mulungjang tazüngla yutsü, koba kecha agia mesüngtet. Mapang ajanga mangyimba sunepjaka onoki teti meima aliba ojala kodanga mamadoktsü. Tanü onoki ojala bilemtet dang, onok külemi mapang indokba aser temeim, dangar dang aria bilemba yimyattem lai onok dang sayuba atema kanga pelar. La bilemtetba ya temoatsü ulura, koba ajanga tanü tashi onok alir.

**Teti onok mulungjang nung alitsü, Temeimbatem.**

**MULUNGNEN O**

Rom 14:8 "Kechiyong asenok taküm lira, asenok Kibuba atema taküm alir, aser asenok süra, asenok Kibuba meyong".



ASO : 24<sup>th</sup> Oct 1969      ASÜ: 20<sup>th</sup> Aug 2024

**ASÜR ETISANGLA JAMIR**

Ozü mangyim jashi nung alidang, medemer-medemsor, kiyong-kidanger, aser ana aser talang nungi shirnokisa tamang sarasadem den nübu, rongsen aser tenla balala ajanga ozü mulung sünepja maparen balala ajanga yaritepogo, nenok ajak dang temulungjang taroktiba agi pelaba lemsateper. Tsüngtong arua nenok ajak dang pelaba meshitet nung, iba sabang ajanga ozü mulungnen o lemsatepba ya yimlibilema nenoki agizükangma ta mepishir. Nenok mapa tajung asoshi onoki kecha lepa magütsüteter, saka takar Tsüngremi nenok ajak talubosa moatsütsü onok tamang sarasadem.

**~ Temeim Kinungbu, Chirnur, Semchir, Anükabang & Kinungertem.**

**INDIA OSANG :**      **Tapak 3 nungi...**

**J&K election: Ganderbal nungi taoba CM...**

Ajisüaka Election Commission of India-i Jammu and Kashmir Legislative Assembly election agitsü August 16 nü sangdongba sülen pa tebilemba melenshiogo.

Mongolbarnü National Conference-i sangdongba candidate 32 indang list nung Omar Abdullah indang tenünga densema liasü. National Conference aser Congress nati Hombarnü nikongtsütsü assembly menden 90 prongla atema menden lemsateptsü asoshi ken o tembanga jembishinüogo.

Menden lemsatepba nung National Conference menden 51 aser Congress 32 nungi tokteptsü aser menden pongu nung party anaprongla tokteptsü. Maneni menden ana parnok den sendaktepa aliba CPI(M) aser National Panthers Party atema mekazüka toktsüogo.

Party ana longjemba ya taoba mapang Farooq Abdullah-i sangdonga liasü. Par jabaso Omar Abdullah-i Congress lenir Rahul Gandhi aser party tir Mallikarjun Kharge na den ajurutepba sülen iba osang ya sangdonga liasü.



## Durand Cup 2024: NorthEast United FC-i Shillong Lajong akok



August 26, 2024 nü Shillong nung Durand Cup semi-final nung Shillong Lajong Football Club (SLFC) madak takok anguba sülen NorthEast United Football Club (NEUFC) asayartem pelatepdang agiba noksa ka angur.

**Shillong, August 27, 2024 (Agencies):** NorthEast United Football Club (NEUFC) nungi Thoi Singh aser Moroccan striker Alaeddine Ajarai nati asaya mezüngbuba shilem nung goal ana agütsüba ajanga Shillong Lajong Football Club (SLFC) madak takok nguogo.

Hombor nikonngang Jawahar Lal Nehru Stadium nung Durand Cup semi-final asaya nung NEUFC-i goal 3 agi SLFC madak takok angu aser NEUFC pur tang mezüng atema Durand Cup final-i iogo.

Yashi iba asaya repringtsü

asoshi nisung 15,000 tema adenshia liasü aser asaya tenzüker minute 13 buba nung Thoi-i mezüngbuba goal agütsü. Iba sülen minute 33 buba nung NEUFC nungisa asayar Ajarai-i tanabuba goal agütsü.

SLFC asayartemia kanga meranga asaya saka NEUFC nungi mid-field asayartemi kanga junga shilem agiba ajanga goal yoktsüsa maangka mengutet. Asaya tatemlen NEUFC coach Juan Pedro Ben Ali-i Parthib Gogoi anioka asayadaksü dang pai tasembuba goal agütsü.

NEUFC coach Benali-i takok anguba sülen kanga pelaba metetdaksü. Tesentepertem Lajong pusemer teimba süaka pai kecha balaka meblem ta ashi.

"Onok kanga janngatemogo. Asenok adianutem lir" ta Benali-i ashi.

Shillong Lajong-i tan agi tanabenbuba Durand Cup semifinals tongogo. 2011 nunga parnoki semifinals tongteta liasü.

NEUFC-i tang mezüng atema Durand Cup final nung asayatsü aser northeast ajungai parnok pusema nungiter.

## Nagaland Assembly... (Tapak 1 nungi)

Minister K G Kenye-ia MLA tem aser nübertem dang tamangba yimsü tsütsü nungi Act mereprangtsü mepishi.

Yi ajemba ya tamangba yimsü tamendakdak mesüra tesayuba den sendaktepa mali saka iba ya meimchir yimya ka lir aser meimchir aliba loktiliba ajak nung teblemtsü ka lir, ta Kenye-ia ashi.

"NLTP Act yanglur küm 35 buba lir aser sorkari iba ajanga loktiliba nung kongshiba meyipa mereprangdang. Anungji onoki onok teinyaktsü inyaktsü meranger aser timtem alibatem koktetsü meranger" ta paisa ashi.

Iba ozüng yangludang pa den Chief Minister Rio aser Deputy CM T R Zeliang nung MLA ama inyaka liasü ta Kenye-isa metetdaksü.

"Tebilemstü onüktem memelenshi aser onoki Act agiendi ta ashir masü saka sorkari Act meyipa repringshitsü aser mapang talangka benshia arudang tajung aser tamajungtem asadangtsü merangerba dang lir" ta pai ashi.

Sorkari aritepa lemtet magitsü kechiyong nübertem sorkar lir anungji nisung teimbai haihaura masü tashi jembiyonga aotsü, ta Kenye-isa shisem.

Ajisüaka, Advisor Kudecho Khamo aser MLA P. Longon o MLA Kuzholuzo Nienu nungeri Act meyipa repringshitsü magizük aser parnoki iba ajanga tamangba yimsü tsütsü kongshitsü ta ashi.

Par aseme Khristan tangatetba nungi jembia aser Act meyipa repringshitsü melena sorkari arogotem aser kin hoho kari ashiba angatsüla ta ashi.

"Nagaland nung yi ajemba ajanga kibong nung rarabangsen adokba, temang nung timtem adokba, yi jemer gari aniba aser yimjak nung meinprong agütsüba azüoktsü teblemba nung NLTP Act ya 1989 küm yanglu" ta Chief Minister Rio-ia ashi.

"Yi ajemba ajema kümdaktsüba ajanga yi dak

sendakba tashidaktem ajema akümtsü ta ser Act yanglu. Iba mapang den putepa iba policy yanglu" ta pai ashi.

"Iba Act ya küm 30 tema benshia arur aser tanü asenoki iba Act ajanga kechi atalok ngua lir. Asenoki Act takok ngua benshir ta meshitetsü" ta CM Rio-ia ashi.

"Tesüiba nunga aser tang-a yi noktangtsü merangba ajanga loktiliba asoshi tamajung ang bentsür arur. Iba ama policy tem inyakdang black market tuluba akümer, syndicate suppliers amala ozüng alema mapa inyakba bulua akümer aser yi tamajung ayoker" ta paisa ashi.

"State sorkaribo yi ayokba mita repringtsü aser noktangtsü mapa dang inyaktsü saka sorkari nisungtem dang yi tejem ta meshitetsü kechiyong iba ya nija mulung. Asenoki prohibition policy meyipa repringdangra Nagaland kübok rural areas nung dang policy tashi itta inyakba angutsü. Külen urban areas nungbo tamakok tulu anguba nguogo" ta CM Rio-ia ashi.

"Arogoi iba atema ola adoker aser arogoi bilemba onüktem onoki pelashishia agizük. State sorkari NLTP Act mapa inyakba nung tashimaitbatem agizük. Ajisüaka state sorkar dak dang tai tongloktsüba ajanga tensa tajungba makümtsü aser iba asoshi külem bangzüng ka aser nisung ajak külemi shilem agitsü nungdaker" ta pai ashi.

"Black market nung yi tamajung ayoker aser iba ajanga temang nung timtem agütsür, yi kar nungbo miim jemsem aser nisung karbo jemer asür. Anungji yi bener aruba jungjunga mita repringba ajanga item nungi jenbuttsü" ta CM Rio-isa ashi.

"Asenok kati ka dak tai metongtsütepi külemi mener külemi shisadangdi aser külemi iba khuret ya koktetsü merangdi. Asenoki asen loktiliba nung yi tamajung ayokba noktangdi" ta paisa ayongzük.

## Jay Shah-i ICC Chair Greg Barclay melenzüktsü



**New Delhi, August 27, 2024 (Agencies):** Board of Control for Cricket in India (BCCI) nung honorary secretary Jay Shah-i International Cricket Council (ICC) nung Independent Chair inyaktsü shimogo.

Iba menden nung Jay Shah den tetokteper shinga melii takok angu aser pai December 1, 2024 nungi iba mapa inyak tenzüksü.

ICC putiotsü nung arishi küm 35 tain Jay Shah ya chairman tanubosang lir.

August 20, 2024 nü ICC Chair Greg Barclay-i kümsük tasembuba atema metokteptsü ta sangoktsüba sülen election agi.

Chairman menden atema

nominee ji Jay Shah dak alaka shinga maliasü aser pai ICC dang maangka agütsüba atema pelaba metetdaksüogo.

"International Cricket Council nung Chair inyaktsü shimba atema ni tali ajemalur. Ni ICC team aser member nations den külemi cricket ya alima nung asaya tongti ka kümdaktsütsü merangtsü" ta Jay Shah-ia ashi.

"Los Angeles 2028 Olympics nung cricket dendaktsüba ya kanga tongtipang lir aser iba ya cricket inloka aoba mapang ka ama bilemer. Iba ajanga cricket tejakleni aotsü ni amanger" ta pai ashi.

ICC Chair tasen ama Jay Shah-ia testüba nung ICC ajanga

takok balala anguba ama nguyonga aotsü nükjidong aliba metetdaksü.

Jay Shah-i October 2019 nungi Board of Control for Cricket in India (BCCI) nung Honorary Secretary aser January 2021 nungi Asian Cricket Council nung Chair inyakba arur.

International Cricket Council nung Independent Chair inyakba aruba India nung rongnung pa pungububa lir.

N. Srinivasan (2014-15) aser Shashank Manohar (2016-2020) nati ICC nung Chairman inyakogo aser külen Jagmohan Dalmiya (1997-2000) o Sharad Pawar (2010-2012) nati International Cricket Council nung President inyakogo.

## Sorkari NHIDCL nem...

(Tapak 1 nungi)

State sorkar aser yimdaklirtemi akokba tashi teyari agüjaka NHIDCL-ia mapa nung tamakok nguogo. Anungji sorkari NHIDCL nem ghonda 72 tsüngda iba National Highway lapoktsü mapang züngzüktsü lemtetogo ta Commissioner & Secretary, Nagaland-ia shidi nung shia lir.

NHIDCL-ia mapang agütsüba tsüngda lenmang melapoktetra state sorkari nungdakba kol aser nübo agüja mapa inyaktsü aser iba senji NHIDCL-ia menoktsü ta shidi nungsa shiogo.

Kohima district kübok Sechü-Zubza nung anentsüh tulu ka aluba ajanga hopta ana shi NH 29 noktanga lir.

## BILEM DANG

"Kaket maliba takdang kaji tanüla maliba temang ama lir"